

<County: City of York>

<Code: L1001>

<MS reference: York, Minster Chapter Library, Dean and Chapter H.1 (3), Chapter Acts 1352-1426>

<Text: Ordinance>

<fol. 100v><line 32> Jtte es ordayned by ye Chaptre of ye kirk of saint Petyr of york yat all ye Masouns y^t sall

wyrk all ye werk of ye same kirk of saynte Petyr sall fra Mighelmesseday vntill ye firste sonday of lentyn be ilka day atte morne atte yaire werk in~ ye loge yat es ordayned to ye Masouns at wyrk in with ye close<?> bysyde ye forsayde kirk als arly als yai may see skilfully by day lyghte for till wyrke and yai sall stande yar trewly wyrkande atte yaire wirke all ye day aftyr als lang als yai may se skilfully for till wyrk yf yt be all werkday outhur elles till itte be heeh none smytyn by ye clocke when halyday falles att none sauf y^t in with y^t forsayde tyme bytwyxx mighelmes & lentyne and in all other tyme of ye yer yai may dyne byfore none yf yai we<?>lle and alswa ette atte none whar yaire like<?> swa y^t yai atte<?> noghte dwell fra yair werk in ye for-sayde loge na tyme of ye yer in any tyme bote swa schort<?> tyme yat na skilful man sall fynde defaute in <ill><1 word crossed out></ill> [yaire] dwellyng and in

tyme of mete atte none yai sall na tyme of ye yer dwell fra ye loges ne fra yaire werk <fol. 101r>forsayde ouyr ye space of ye tyme of an houre And aftyr None yai may drynk in ye loge Ande for yaire drynkyng tyme bytwyxx Mighelmes & lentyn yai sall noghte cese no lese yare werk passand ye tyme of half a Mile+way Ande fra ye firste sonday of Lentyn vntill Mighelmesse yai sall be in ye forsayde loge atte yaire werke atte ye sun risyng ande stande yare trewely ande bysily wyrkande apon ye forsayde werke of ye kyrk all ye day vntill itte be na+mare space yan tyme of a mileway byfore ye sone sette yf itte be werkday outhur elles vntill tyme of none als itte es sayde byfore saf y^t yai sall bytwix ye firste sonday of lentyne ande Mighelmes dyne ande ette als es byfore-sayde ande slepe ande drynke aftyr <ill>one word</ill> in ye forsayde

loge ande yai sall noghte cese no lefe yair werke in slepyng tyme passande ye tyme of a myleway no in drynkyng tyme aftyr None passande ye tyme of a myleway Ande yai sall noghte slepe eftyre None na tyme botte bytwene saynte Elenmes and Lammes And yf any man dwell fra ye loge ande fra ye werk forsayde outhur make defaute any tyme of ye yer agayne ye forsayde ordinance he sall be chastyde with abatyng of his payment atte ye loking~ ande deuyss of ye Maistryr Masoun and all yer tymes and houres sall by reweled bi a Bell ordayned yare-fore



Ande als wa it es ordayned y^t na Masoun sall be receauyde atte wyrke to ye werk of ye
forsayde kyrke bot he be firste prouede a woke or mare opon his wele wyrkyng and aftyr
y^t he es foundyn souffissant of his werke be receauyde of ye comune assente of ye Mayster~
& ye kepers of ye werk ande of ye Maystyr Masoun & swere apon ye boke y^t he sall trewly
<ill><1 word></ill> bysyli at his power for-oute any maner gylyry fayntys outhur desayte hald &
kepe haly
all ye poyntes of yis forsayde ordinance in all thynges y^t hym touches or may touch<?>s fra
tyme y^t he be receauyde till ye forsayde werke als lang als he sall dwell Masoun hyryd
atte wyrk till y^t forsayde werke of ye kyrk of Saint Petyr Ande noght ga away fra y^t
forsayde werke bote ye Maystyrs gyf hym lefe atte parte fra y^t forsayde werk Botte ye Maystyrs
gyf hym lefe atte parte fra y^t same werk Ande wha sum euyr run<?> agayne yis ordinance?
and brek itte agayn ye will o ye forsayde Chapitre haue he goddys malysun and saynt Petyr .